

11. ETUPUPUNGARE YAKOBO ENKAI Enkiterunoto 32,33

Ore eidipa Yakoboa tobiko ilarin kumok tenebo ole nkapu lenye Laban, nemayiani too luat sapuki o nchoo, o nkera kumok o olaisiayiak kumok. Negelu ajo etaa erishata sidai nashuko ninye alo Kanaan, hoo neton apake eure olalasho lenye Esau, apa oteleja tialo imayianat e papai lenye.

Ore etaa ebaiki Kanaan neirriwaa Yakobo inkishoorot kumok o nchoo airriwaki Esau etem aing'oru omom te ninye eton eitu ebau. Nepuonu ilaikitalak anang'are ninye, nejoki inchere egira Esau alotu anang'are ninye erikito enjore o lewa iip ong'uan. Neureshoyu Yakobo, neomon Enkai, "Nai e papa lai Abraham, nai e papa lai Isaka, Olaitoriani laa ninye laatiaka tushukoyu enkop inyi o enetii entalipa ino, pee amayian, manarikino nanu nena pooki nikintaasa eimu enyorrata ino nauno, nikintol ajo ira oloisiligayu atoomono tasaruaki te nkaina e Esau. Aisiligata atua enkisiligata ino pee intaa eishoi ai anaa osunyai le naiposha."

Ore ake peyie ebaiki olkeju le Yordan, neirriwaa, neisho Yakobo inkituak enyena metalanga olkeju, nebik ninye openy teilo kekun loo lkeju enkewarie pooki. Ore etii ninye ine, nepupung'are oltungani Yakobo enkewarie pooki. Ore pee ekenyu, ore pee elaikino oltung'ani atanangai ninye, neibung oloudo, nepuku ninye oloudo terubata, nejo, "Inchooki mashomo, amu ekenyua." Kake nejoki Yakobo, "Maisho shomo meteleku tenikimayian nanu."

Nejoki ilo tung'ani ninye, "meitoki aekata enkarna ino aaku ekiji Yakobo, kake Israeli, amu itapupungare iyie Enkai o iltung'ana, nindimua pooki. Nejoki Yakobo, "aitoduaa Enkai king'ura too nkomomi neitajewuoki enkishui ai arashu etasaruaki enkishui ai."

Ore ake aa enalusorie Olmalaika, nedol Yakobo Esau. Neirruugo, aitadou kewan tedukuya Esau, neng'amu Esau ninye tolng'ur o tempalikinoto sii, eigira aing'asiakino eneikuna Enkai pee emayiana Yakobo. Neibalunye Yakobo eneba empiris e Nkai naishoo ninye inkera. Neisho Yakobo Esau inkishorot oo nkishu, ejoito, "ore pee adol enkomom ino natiu anaa olotodua enkomom e Nkai, neisualaki kitang'amua te nkoitoi kirotet naijo ina." Ore pee elusoo ena neitoki Yakobo o Esau aabik to sotua ilarin kumok.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Irorie sii iyie oltung'ani liboitata imaakinyie embae nataase te iyie, nimiyiolo ajo kaa ias, ninteru aureshoyu neaku meata enindim ataasa? Kaa itaasa tialo ina bae?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko ena atini teneutaki iyiook inchere keata Enkai engolon pooki?** (keata enkitoria pooki, netii shumata pooki, neata enkitoo pooki.)
 - Etamayiana Yakobo aisho inkera a luat oo nkishu.
 - Eibeleyenya oltau le Yakobo, neshetu enkirukoto enye.
 - Neipang'aki Yakobo te nkoitoo oltung'ani, neitaa ninye tarrush.
 - Neibeleyenya oltau le Esau aibeleyenya Yakobo, nemitu ninye.
 - Neigil aitubul Yakobo te Kanaan Enkop e Nkisiligata.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - Etiaka apa Enkai Yakobo inchere keshuku ninye ayau ninye inakop enkisiligata.
 - Etayiolo apa Enkai enetii Yakobo nelotu atumore ninye te nkoitoo oltung'ani.
 - Etayiolo enaure e Yakobo.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Eing'asie Yakobo pee edol kewan eishu hoo netoduaa enkomom e Nkai neyiolou ajo meata entoki nanare ninye mme toki.
- **Kaji eiko ena atini teneiteng'en iyiook inchere keata Enkai empiris?**(kenyorrisho, keata olong'urr tialo ilaing'okok, nenana oshoke, neton ake eirorie oltung'ani)
 - Neomon Yakobo Enkai, neitadamu kewan inchere, ore inkiasin e Nkai neing'uaa enyorrata Enkai, neisiligayu Enkai oleng' te ninye.
 - Etomituo Enkai Yakobo, neshuko ninye hoo nemenarikino apa neitaasi ninye ina.
 - Neibeleyenya Enkai oltau le Yakobo, nedol eng'oki enye makewan, neitoborr ninye ina, neiteru airishakino Enkai.
 - Neitayu Enkai Yakobo oloudo pee eitadamu ninche too rishat pooki inchere pee meirishakino ake eng'olon enye makewan kake pee eirishakino engolon e Nkai.
 - Neisho Enkai Yakobo erishata metoduaa ninye, neisho ebik eishu hoo naa olaing'okoni.
 - Neibeleyenya Enkai oltau le Esau pee etumoki atapaliki olalashe lenye.
 - Ore pee edol Yakobo enkomom e Nkai, nejeu enkishui enye, nelotu aidim atoduaa arashu aing'ura enkomom e Esau nedol te ninye empalakinoto o enyorrata. Naa enkitodolunoto apa ena e Nkai tialo olosho lenye gelunoti eimu Kristo.
- **Kaji eiko ena atini teneutaki iyiook inchere KEISILIGAYU Enkai? (meibeleyenya, keibung inkisiligat enyena, keas sii inaja)**
 - Eitabayie Enkai enkidetid e Yakobo pee eyau ninye ashuku ina kop, nerrip ninye, nemayian ninye.
 - Neiteng'el ilo ajung'oni ogeluno tialo Abraham, ilo laa olmarei lenye epukunye Olaitajeunoni oisiligishoreki inchere ore nabo olong' naa kelotu.

KAINYIOO KINTENG'ENA ENA ATINI NAIPIRTA OLTUNG'ANI?

- Neyiolou Yakobo inchere kenarikino negorokino Esau ninye amu etaasa eng'oki tialo ninye ap ate dukuya.
- Nedol Yakobo kewan inchere meidim kewan makewan, keyieu Enkai ake.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Eng'amu Enkai ilooborr o lelo oirishakino ninye. Amu etoduaa apa Yakobo empiris e Nkai, neitadou kewan te dukuya ninye.
- Eisiliga Yakobo Enkai naa ina pee eewao enetii Esau te nkitadounoto e kewan.
- Ore Enkai neasishore oltung'ani aiteru pooki toki, nelotu atumore ninye, neasisho tiatua enkishui enye pee eibeleyenya oltau lenye anaa enaikuna pee eibung' oloudo le Yakobo neirorie ninye.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- **Eitashalaki apa Yakobo Enkai anaa neibung'i ninye oloudo. Neitadamua ninye ena pee eisilig Enkai. Tiakua oitoi ining iyie anaa ishal?** Kaji oshi ias iyie tenining ajo ishal? Kainyioo easita Enkai tiatua enkishui ino pee eponaa enkusiligata nisilig iyie ninye.
- **Kakua tung'ana tiatua enkishui ino itaasa eng'oki tialo ninye/niche? Aing'ae ilo onare nilo aomon empalakinoto? Kaji pasa kindim iyie atareto olkilikuai le Nkai pee itumoki atoomonu empalikinoto te ninche o te Nkai sii.**